

PEMBERITAHUAN PERTANYAAN DEWAN RAKYAT

**PERTANYAAN : JAWAB BUKAN LISAN**

**DARIPADA : TUAN NG WEI AIK [ TANJONG ]**

**TARIKH : 7 OKTOBER 2014 (SELASA)**

**SOALAN :**

**Tuan Ng Wei Aik [ Tanjong ]** minta **MENTERI PEMBANGUNAN WANITA, KELUARGA DAN MASYARAKAT** menyatakan sama ada Akta Orang Papa 1977 akan dipinda supaya anak-anak atau ahli-ahli keluarga yang mengabaikan ibu bapa atau mana-mana ahli keluarga mereka akan turut dihukum. Nyatakan hala tuju yang akan diambil oleh pihak Kementerian supaya pindaan-pindaan dapat dilakukan untuk menjadikan akta tersebut lebih berperikemanusiaan serta menjaga maruah golongan orang papa.

**JAWAPAN :**

Kementerian Pembangunan Wanita, Keluarga dan Masyarakat (KPWKM) amat komited untuk terus memberi perhatian kepada aspek kebajikan dan keperluan golongan warga emas dan orang papa bagi meningkatkan kualiti hidup dan kesejahteraan golongan ini.

KPWKM menyambut baik cadangan untuk Akta Orang-Orang Papa 1977 (AOP 1977) dipinda agar penguatkuasaan terhadap akta tersebut dapat dilaksanakan dengan lebih efektif dan proaktif. Namun begitu KPWKM belum berhasrat untuk menguatkuasakan sebarang undang-undang untuk menghukum ahli keluarga atau anak-anak yang mengabaikan ibu bapa atau mana-mana ahli keluarga. Hal ini adalah kerana KPWKM yakin masyarakat Malaysia hari ini masih berpegang teguh kepada pegangan agama dan nilai budaya timur yang tinggi serta memupuk kasih sayang terhadap ibu bapa atau anggota keluarga yang lanjut usia. Cadangan pindaan tersebut memerlukan perbincangan dan maklumbalas dari semua pihak berkepentingan. Tambahan pula, menghukum bukanlah jalan terbaik untuk menyelesaikan sesuatu masalah. Peranan semua pihak seperti

institusi keluarga, masyarakat, NGO-NGO, institusi pendidikan, pertubuhan keagamaan sewajarnya memainkan peranan memberi didikan dan kesedaran berkaitan tanggungjawab terhadap ibu bapa.

AOP 1977 digubal bagi tujuan menjaga dan memulihkan orang papa. Oleh itu, pelaksanaan akta tersebut akan memastikan kesejahteraan dan pembangunan orang papa dipelihara melalui program-program penjagaan, latihan dan bimbingan serta pengintegrasian.

Bagi memastikan pelaksanaan AOP 1977 lebih berkesan untuk kesejahteraan orang papa, pindaan sedang dibuat ke atas akta tersebut. Pindaan AOP 1977 melibatkan penambahan peruntukan penguatkuasaan membanteras sindiket pengemisan. Kebelakangan ini, banyak aktiviti pengemisan didalangi oleh individu dan kumpulan tertentu. Mereka telah menggunakan kanak-kanak, OKU, warga emas dan warga asing untuk meraih simpati dan mendapatkan wang dari orang ramai. Sindiket ini menjalankan aktiviti pengemisan secara terancang dengan menyediakan tempat tinggal, makanan dan pengangkutan untuk pengemis. Buat masa

ini dalam AOP 1977 tiada peruntukan penguatkuasaan boleh diambil untuk membentaras individu dan kumpulan sindiket ini.